


TEZAU LITURGIC
23 IANUARIE

SLUJBA
SOBORULUI
SF. KOSTROMEI



MOSCOVA, 2000



СЛУЖБА СОБОРУ СВЯТЫХ ОТЦЕВ В ЗЕМЛЕ КОСТРОМСКОЙ ПРОСИЯВШИХ

МАЛАЯ.ВЕЧЕРНЯ

СТИХИРЫ НА «Господи воззвах», глас 4;на 4:

Радуется вельми Костромская страна,/ веселится малое стадо Христово:/ преподобных и богоносных отцев собор прославляется/ и молитвенно ублажается нами днесь./ Церкви православной благолепие и украшение,/ иноков Боголюбивых похвала и слава,/ края сего утверждение и на небесех предстательство,/ и вся земли Российстей освящение.

Всечестнии и Богомудрии отцы,/ постницы и молитвенницы преславные,/ Христово смирение и Ангельскую кротость возлюбивши,/ безстрастия благодатного в преуспейнии духовном достигши,/ Богодарованными добродетельми украсившиеся;/ во спасении душ погибающих тщащиеся/ всех притекающих к Вам, Костромския светильницы.

Преподобнии и Богоноснии отцы,/ чудотворцы и целители предивнии,/ духов лукавых

благодатно победившие,/ и тех далече от душ одержимых отгнавшие;/ Богоданный разум Истины Христовой являя,/ на путь спасительный, яко кормчии искуснии наставляли есте/ всех притекающих к Вам, Костромския светильницы.

Златословеснии и Богоглаголивые отцы,/ Истины Христовой непоколебимии столпи,/ исповедницы и проповедницы небесных таин,/ исполнителие и изъяснителие заповедей Господних./ Веры основание и ересей погубителие,/ заблуждений и суеверий обличителие,/ и наставницы верныя/ всех притекающих к Вам, Костромския светильницы.

Слава, **глас 6:**

Края Костромскаго всечестнии отцы,/ во всю землю Российскую изыде вещания исправлений Ваших:/ тем на Небесех обрятоште мзду трудов Ваших,/ демонов разрушите полки,/ Ангелов достигоште чины,/ ихже житию непорочно поревновали есте:/ дерзновение имуще ко Господу,/ мир испросите душам нашим.

И ныне, **глас тойже:**

Достойно есть яко воистину,/ блажити Тя Богородицу:/ в Твое бо Пречистое вшед чрево всех Содетель,/ плоть бысть, не преложився естеством,/ ниже мечтався о смотреии:/ но восприятей из Тебе словесно одушевленной плоти/ соединився, по ипостаси./ Отнюдуже благочестно, во обоих естествах являющихся, разнство творим./ Того моли Честная Пресвятая,/ низпослати нам мир и велию милость.

СТИХИРЫ НА СТИХОВНЕ; глас 1
Подобен «Небесных чинов...»:

Празднуется нами светло днесь/ Ваше святое торжество,/ иночества русского звезды умная,/ светильницы духовнии земли Костромской;/ Сергия Великого отрасль достойная/ в молитвах присно ублажается.

Стих: Восхвалятся преподобнии во славе,/ и возрадуются на ложах своих.

Лозы плодоносящая виноградника Христова,/ сада райского благоуханныя крины,/ насаждения Небесныя, псаломски, яко финикс, процветшии:/ добродетельми, яко кедр, иже в Ливане, умножившиися;/ сеяния Господня

плоды, в Костромской земли, духовно прозябшия/ нами в молитвах присно убажжаются.

Стих: Священницы Твои облекутся в правду,/ и преподобнии Твои возрадуются.

Постников священное сословие,/ псалмопения златогласные уста,/ подвига умнаго кадила благовонныя,/ храмы одушевленныя Господни;/ таин Небесных зрителие мысленные/ в молитвах нами присно убажжаются.

Слава, **глас 2:**

В преподобии и правде подвизавшиися,/ Истину Христову паче всего земнаго возлюбили есте,/ и Божественнаго Царствия вожделевая,/ идеже несть болезнь, ни печаль, ни воздыхание,/ свято жительствоваши в дебрех пустынных Костромских,/ безмолвно и безропотно скорби и искус терпя:/ Господом, яко адаманты веры прославлени бысте/ и, яко гради велиции, не могущие укрытися верху горы стоя,/ светом Божественным добродетелей Духа Святаго/ всякого, к Вам грядущего осиявали есте,/ проповедуя и благовествуя деяньми Воскресение Христово:/ нами ныне в молитвах восхваляетея отцы равноангельстии.

И ныне, **глас тойже:**

Спаси от бед рабы Твоя Богородице,/ яко мы усердно к Тебе прибегаем, / яко Нерушимой Стене и Предстательству.

Тропари писаны на Велицей вечерни.

НА.ВЕЛИЦЕЙ.ВЕЧЕРНЕ

«Блажен муж»: 1 антифон.
На «Господи возвах»: стихиры, глас 8
подобен «О преславного чудесе» на 8:

О, преславного чудесе,/ Живоносный сад,/ на земли Костромской Божественный прозябший/ нами славословится днесь,/ сеяния небесного класы духовные,/ семена райские житницы Христовой,/ благодати водами напояемии,/ сторицею плод Владыце принесшии/ молитесь за ны, яко присно ублажаемии.

О, преславного чудесе,/ Костромской земли святых собор,/ песненно восхваляется днесь,/ и в молитвах призываются/ православия и благочестия истинного ревнители/ таинники Христовы Божественныя,/ вместителища благодатные Духа Святаго,/ храмины добродетелей честнии,/ и молитвенницы о душах наших.

О, преславного чудесе,/ звезды мысленнии,
святии,/ благодатию небесною возжженныя,/ и
в земли Костромской возсиявшии,/ Истины
Христовой светильницы пресветлии,/ светом
добродетелей ваших озаряете вся;/ в молитвах
помощь подаете/ и на путь спасения
наставляете/ светоносную вашу память
празднующих.

О, преславного чудесе,/ богоноснии
источницы,/ реки из рая Эдемского текущая,/ и
благодатно страну Костромскую орошающая,/
живоносною и спасительною влагой
напоющая/ присно молебно почитающих вас,/
Костромские велии угодницы Божии,/ реки
чудес показаша нам,/ притекающим к вам,
преславнии.

О, преславного чудесе,/ житилие града
небеснаго,/ жития течение добре скончавшии,/
нами воспеваются днесь,/ воздаяния трудов
постнических восприимшии/ от Владыки
Господа, егоже возлюбили есте,/ и яко
ангельскому лику сопричтостесь/ молитвенницы
за люди Костромской земли явистесь:/ сего ради
вас величаем.

СТИХИРЫ преподобному Геннадию, глас и
подобен тойже:

Возгревая дар Божий,/ живуций в Тебе отче
всечестный Геннадие,/ отрвая же всяку
житейскую суету,/ очистив себе от всякия
скверны плоти и духа,/ соделался еси сосуд в
честь,/освящен и благопотребен Владыце,/ на
всяко дело благое уготован./ Темже уготовася ти
неувядаемый венец Божественныя славы,/
егоже сподоби, Господи, и нас грешных,/
молитв ради угодника Твоего.

Таланты прием от руки Господни,/ потщався
добре,/ и другие приобрел еси ими,/ да
благоугодная сотвориши Господеви./ Сего ради
и услышал от Него сладчайший глас:/ добрый
рабе, благий и верный,/ вниди в радость
Господа твоего.

Якоже иногда мудрыя девы,/ приемше елей в
сосудех со светильники своими,/ изыдоша в
сретение жениху,/ изшел еси отче
преподобный,/ в пустыню Любимоградскую,/
нося в чистом сердце своем,/ яко в сосуде,
благоприятном Владыце,/ светильник веры, елей
же любви Божественныя,/ и Спаса Господа
взыскуя,/ Егоже и обрел еси,/ и в чертог Его
вшел еси./ Темже вопием Ти:/ блажен еси,
Геннадие,/ званный на вечерю брака Агнча.

Слава, глас 2:

Киими похвалами восхвалим преподобных отцев
собор,/ киими славословии прославим
светоносную память вашу,/ человецы бо
небеснии и ангели земные явились есте,/ в
землях Костромских добродетельми просияв,/
ныне в небесных обителях живете веселящися,/
светом Божественным воистину обожаеми,/ на
земли же телеса ваша, яко кадила благовонныя,/
благоухают и источают исцеления всем,/ с
верою и упованием в молитвах к вам
прибегающим,/ и святое ваше творящим
празднество.

И ныне, глас тойже:

Прейде сень законная,/ благодати пришедши:/
якоже бо купина не сгораше, опаляема,/ тако
Дева родила еси/ и Дева пребыла еси./ Вместо
столпа огненнаго/ праведное возсия Солнце,/
вместо Моисея — Христос,/ спасение душ
наших.

Вход. Прокимен дне. И чтения 3
преподобнические.

Премудрости Соломони чтение (глава 3):

Праведных души в руке Божией, и не прикоснется их мука. / Непщевани быша во очесех безумных умрети, / и вменися озлобление исход их, / и еже от нас шествие — сокрушение, / они же суть в мире. / Ибо пред лицом человеческим аще и муку примут, / упование их бессмертия исполнено: / и, в мале наказани бывше, / великими благодетельствовани будут, / яко Бог искуси их и обрете их достойны себе. / Яко злато в горниле, искуси их / и, яко всеплодие жертвенное, прият я. / И во время посещения их возсияют и, яко искры по стеблию, потекут. / Судят языком и обладают людьми, / и воцарится в них Господь во веки. / Надеющиеся Нань уразумеют истину, / и вернии в любви пребудут Ему. / Яко благодать и милость в преподобных Его / и посещение во избранных Его.

Премудрости Соломони чтение (глава 4):

Праведник аще постигнет скончаться, в покои будет. / Старость бо честна не многолетна: ниже в числе лет исчитается. / Седина же есть мудрость человеком, / и возраст старости, житие нескверное. / Благоугоден Богови быв, возлюблен бысть, / и живой посреде грешник,

преставлен бысть./ Восхищен бысть, да не злоба изменит разума его,/ или лесть прельстит душу его./ Рачение бо злобы помрачает добрая,/ и парение похоти пременяет ум незлобив./ Скончався в мале, исполни лета долга,/ угодна бо бе Господеви душа его./ Сего ради потщася от среды лукавствия./ Люди же видевшие, и не разумевшие,/ ниже положше в помышлении таковое,/ яко благодать и милость в преподобных Его/ и посещение во избранных Его./

Премудрости Соломони чтение (главы 5 и 6):

Праведницы во веки живут,/ и в Господе мзда их, и попечение их у Вышняго./ Сего ради примут царствие благолепия/ и венец доброты от руки Господни,/ зане десницею покрывает я, и мышцею защитит их./ Приимет всеоружие рвение свое/ и вооружит тварь в месть врагом./ Облечется в броня правды/ и возложит шлем, суд нелицемерен./ Приимет щит непобедимый, преподобие,/ поострит же напрасный гнев во оружие,/ споборет же с ним мир на безумныя./ Пойдут праволучныя стрелы молниины/ и яко от благокругла лука облаков, на намерение полетят./ И от каменометныя ярости, исполнь падут грады./ Вознегодует на них вода морская,/ реки же потопят я нагло./ Сопротив

станет им дух силы,/ и яко вихор развеет их,/ и опустошит всю землю беззаконие,/ и злодейство превратит престолы сильных./ Слышите убо, царие, и разумеите,/ навьикните, судии концев земли./ Внушите держащие множества, и гордящиеся о народах язык./ Яко дана есть от Господа держава вам/ и сила от Вышняго./

СТИХИРЫ НА ЛИТИИ:
Стихира храма и далее преподобному Геннадию, глас 2:

Избранниче Божий,/ от юности твоя исполнен сый духа разума и благочестия,/ духа страха Господня,/ презрел еси все суетная и тленная,/ в пустыни же водворяяся,/ яко Ангел во плоти, был еси,/ Геннадие блаженне./ Темже к тебе верою притекающе, молимся:/ моли Христа Бога спастися душам нашим.

Слава, **глас 6:**

Днесь благодать Святаго Духа нас собра,/ в празднование памяти богоносных отец земли Костромской,/ и вси сошедшиися, тако рцем:/ радуйтесь, обители благодатные Духа Божественного/ святители Ионо и Никодиме,/ преподобные отцы Павле, Макарие, Геннадие,/ Кирилле, Пахомие, Александре, Иакове,/ Адриане, Паисие, Варнаво, Авраамие,/ Григорие, Феррапонтe, Никито, Тимоне,/ также

Тихоне и Иакове со иными многими -/ вас бо
Господь, яко всеплодие жертвенное прият,/ на
земли прослави и на небеси венча:/ сего ради
молитесь о спасении душ наших.

И ныне, **глас тойже:**

Богородице, Ты еси лоза истинная,/
возрастившая нам плод живота,/ Тебе молимся,
молися Владычице/ со святыми отцами земли
Костромской,/ помиловати души наша.

СТИХИРЫ НА СТИХОВНЕ, глас 5
Подобен «Радуйся...»:

Радуйтесь, богоносные отцы,/ горлицы Господни
пустыннолюбивые,/ пением молитвенным дебри
Костромской земли/ в славословиях благодатно
огласившия;/ сосуди богоизбранные,/ Духа
Святаго честныя жилища,/ слава церковная,
добродетелей исправление./ Сего ради память
вашу/ в песнях и пениях празднуем.

Стих: Восхвалятся преподобнии во славе,/ и
возрадуются на ложах своих.

Радуйтесь, преподобнии отцы,/ постнического
жития украшение,/ подвига молитвенного
ревнителие,/ добродетелей божественных
зерцала,/ богатство некрадомое благочестия,/
безмолвия духовного священнотаинники,/ края

Костромского похвала и слава;/ темже сошедшеся благочестно вси/ светозарную вашу память празднующе.

Стих: Священницы Твои облекутся в правду,/ и преподобнии Твои возрадуются.

Радуйтесь, блаженнии отцы,/ в скудости на земли пожившие,/ глад и наготу претерпевшии,/ зной и жажду терпеливно понесшии:/ яко злато Владыце представшии,/ искушенное от земли, очищенное седмицею,/ и в небесных обителях ныне веселящися,/ поминайте в молитвах чтущих память вашу,/ в Костромской земле плоды священно прозябшии.

Слава, **глас 6:**

Приидите, вернии,/ духовно возвеселимся днесь,/яко в нарочитом дни праздника,/ и, ликовствующе, возопием:/ радуйся, Геннадие, веры благочестивое правило;/ радуйся, образе кротости духовныя./ Радуйся, светильниче Божественныя Троицы,/ Ейже предстоя со Ангелы,/ молися, угодниче Божий,/ да благодать и мир подаст душам нашим.

И ныне, **глас тойже:**

Творец и Избавитель мой, Пречистая, Христос
Господь,/ из Твоих ложесн прошед, в мя
оболкийся,/ первыя клятвы Адама свободи./
Темже Ти, Всечистая,/ яко Божии Матери же и
Деве,/ воистину вопием немолчно:/ радуйся
ангельски, радуйся, Владычице,/
предстательство, и покрове,/ и спасение душ
наших.

НА БЛАГОСЛОВЕНИИ ХЛЕБОВ

Тропарь собора святых: глас 5

Яко многоцелебныя источники,/ вод
животворящих и духовных исполняемии,/
истаявших зноем страстей живительно
напоете,/ землю Костромскую благодатно
орошаете:/ преславный отцев святых собор,/
бесплотных сожителие, Христовы воины;/ ихже
молитвами Спасе,/ милости Твоя спасительныя
нам даруй.

Тропарь преп. Геннадия, глас 4

Яко пустыннолюбивая горлица,/ от суетного и
многомятежного мира в пустыню удалився,/
чистотою и говением, молитвами и труждением/
прославил еси Бога в душе и телеси своем./ И
такo благочестно пожив,/ явился еси,

преподобне Геннадие, пустыни Любимоградския украшение,/ и инокам честнаго жития образ/ и теплый молитвенник за всех,/ притекающих к тебе с верою.

И Богородице Дево... **единожды.**

НА.УТРЕНИ

На «Бог Господь»: тропарь святых, дважды.

Слава: тропарь преп. Геннадию; и ныне, глас 4:

Еже от века утаенное/ и Ангелом несведомое таинство,/ Тобою, Богородице, сущим на земли явися Бог,/ в неслитном соединении воплощаем/ и, Крест волею нас ради восприим,/ имже воскресив первожданного,/ спасе от смерти души наша.

По 1-м стихословии седален, глас 2:

Яко пришельцы на земли пребывая и горняя вожделевая,/ страсти плотския слезами покаянными изсушили есте,/ суеты жития временного, яко уметы вменив,/ звезды благодатные миру явились есте./ Темже молим Богоносных отцев Костромских собор:/ молитися ко Господу, спастися верою хвалящим вас.

Слава, глас 3:

В законе Господнем поучаяся день и ночь/ и свидения Его испытуя,/ не дал еси отче, сна очима твоима,/ ни веждома твоима дремания,/ дондеже в сердце своем обрел еси место Господеви,/ селение богу Иаковлю./ Сего ради, яко храм духовен, благодатию Божиею приосененный,/ и доброе пристанище всем, притекающим к Тебе, явился еси,/ и неоскудный от честных мощей твоих/ источаеши верным источник исцелений.

И ныне, глас тойже:

Пречистая и Препоблагословенная Дево,/ Божественным рождеством Твоим истлевшее страстьми земнородных естество обновися/ и, свободя от смерти и адовых уз, приведесе к наследию жизни вечныя./ Темже Тя вси роди достойно ублажают.

По 2-м стихословии седален, глас 6:

Равноангельное житие показасте нам, преподобныя отцы,/ пламень бо огня Божественного в сердце своем стяжавши;/ в постнических и бденных подвизах преуспевая,/ к почести вышняго града, небесного

Иерусалима, устремилися есте,/ и достигши того, яко предстателие и молитвенницы за люди земли Костромския/ нами ныне ублажаетеся.

Слава, **глас тойже:**

Облеченный в виссон чистоты и правды,/ благоухая мирами добродетелей/ и ни во едином от благодатных дарований лишаяся, всечестный Геннадие,/ вемы, яко с лики праведных и сонмы бесплотных сил предстоиши пред престолом Божиим,/ славя выну Царя Славы, Господа Вседержителя, и моляся прилежно,/ да и мы, многогрешнии и неключимии раби,/ оправдишася благодатию Его,/ наследницы будем жизни вечныя.

И ныне, **глас тойже:**

Непостижимому и неизреченному,/ купно же славному и ужасному таинству вочеловечения Бога Слова дивящеся,/ в преклонении душ и сердец наших пред Тобою,/ Дево Пречистая, ликовствуя, взываем:/ радуйся, Благодатная, Господь с Тобою.

ВЕЛИЧАНИЕ:

Ублажаем вас/ преподобных отцев собор, края
Костромского покровителей,/ и чтим святую
память вашу,/ вы бо молитесь за нас/ Христа Бога
нашего.

Псалом избранный:

1. Терпя, потерпех Господа, и внят ми, и услыша
молитву мою/
 2. Постави на камени нозе мои и исправи стопы
моя./
 3. Се удалихся, бегая, и водворихся в пустыни./
 4. Все языцы обыдоша мя, и Именем Господним
противляхся им./
 5. Честна пред Господом смерть преподобных
Его.
 6. Пойте Господеви, преподобнии Его, и
исповедайте память святых Его, во всех людех
чудеса Его./
- Слава и ныне;/ Аллилуйя: **трижды.**

ПО ПОЛИЕЛЕЕ седален, глас 7:

Блажени есте, преподобные отцы,/ яко земных
и тленных наслаждений небрегосте/ и в земле
Костромской мужественно постнически
подвизавшиися,/ для мира сего умершии
прежде смерти воздержанием велиим явилися

есте./ Сего ради по преставлении своем у престола Вседержителя предстоюще,/ молитесь о спасении душ наших.

Слава, **глас 1:**

Скорбь и тесноту, поношения и озлобления/ Царствия ради Небеснаго и за Имя искупльшаго нас/ и предавшаго Себе за ны, Господа нашего Иисуса Христа,/ претерпел еси, отче преподобне, и не изнемогл еси./ Сего ради блажен еси, соблюдающий заповеди и Богови верный даже до смерти,/ неувядаемый бо славы венец уготовася ти./ Егоже, Царю и Господи, не лиши и нас, грешных,/ молитв ради угодника Твоего Геннадия.

И ныне, **глас тойже:**

Яко к нерушимой стене и тихому пристанищу,/ к покрову Твоему, Преблагословенная Богородице, притекающе,/ влаемии волнами житейских попечений, вопием:/ Владычице, покрый, соблюди и спаси на Тя уповающия.

Степенна 1 антифон 4-го гласа.

Прокимен, глас 4: Честна пред Господем/ смерть преподобных Его. **Стих:** Что воздам Господеви о всех, яже воздаде ми?

Всякое дыхание...: **Евангелие от Матфея, зач. 43**
По 50-м псалме стихира, глас 6:

Днесь благодать Святаго Духа нас собра,/ в
празднование памяти богоносных отец земли
Костромской,/ и вси сошедшиися, тако рцем:/
радуйтесь, обители благодатные Духа
Божественного/ святители Ионо и Никодиме,/
преподобные отцы Павле, Макарие, Геннадие,/
Кирилле, Пахомие, Александре, Иакове,/
Адриане, Паисие, Варнаво, Авраамие,/
Григорие, Ферапонте, Никито, Тимоне,/ также
Тихоне и Иакове со иными многими -/ вас бо
Господь, яко всеплодие жертвенное прият,/ на
земли прослави и на небеси венча:/ сего ради
молитесь о спасении душ наших.

КАНОН

ПЕСНЬ 1. Глас 8

Ирмос: Богоизбранному Израилю* сквозе
Чермнаго моря Моисей*, гласом Господним
наставляемый*, путь пешеходящий показа*;
свободив от погони вражия* Богу победную
песнь поя: яко прославися.

Светом благодати озаряеми, святии,/
просвещением Истины землю Костромскую
удобрили есте,/ сего ради людие/вельми вас

почитают и восхваляют, глаголя:/ во святых своих дивен Господь, славно прославися.

Любомудрие небесное/паче славы мира сего возлюбивше,/ и желания плотские отвергше, святии,/ все духовные стремления своя/ во смирение Господеви повинули есте,/ присно поя Ему: славно прославися.

Слава:

Ангели земныя и человецы небеснии,/ отцы Костромские, явились есте,/ сиянием Трисолнечного Божества озаряя,/ просвещая и ко спасению наставляя души,/ благодарно вопиющих о подвизех ваших Господу:/ славно прославися.

И ныне:
Вышних сил Превысшая/ и плотию Бесплотного рождшая, Пречистая Владычице,/ Сына Твоего и Христа Бога нашего,/ со всеми святыми края Костромского/ моли о спасении душ наших.

ПЕСНЬ 3

Ирмос: Смиряй и возвышай, елико восхоте Господь* и благодатною препоясуяй силою*, на недвижимом камени веры утверждаяй*, и души от страстей избавляяй*; несть свят, паче Тебе, Господи.

Умом чистейшим рассмотрел еси/ Ума всех
виновнаго,/ сего ради прием дарование чудес,/
верные удивляеши, любовьи Тебе почитающия,/
премудре святителю Ионо.

Истинное смирение и целомудрие стяжав
попремногу/ и чистоту телесную, якоже
подобает святым,/ лета многа в пустыни
пребывшу/ в безмолвии, пощении и всех
скорбных в терпении;/ тя, Павле, яко
избранника Христова, ублажаем.

Слава:

Присно Господеви молитвою прилепляся/ и
постом страстей пламень угашая,/ росу
Божественная благодати в душу свою приим,/
отче богоносе Макарие,/ на реце Письме
водворясь,/ в подвизах доблих потщался еси:/
сего ради отверзся тебе Царствие Небесное.

И ныне:
Огонь Божественный благодатный,/ Владычице,
сниде на Тя/ и Сила Вышняго осени Тя;/ и яко
Мати и ходатаице рода Христианского/
молишися о нас: тем Тя величаем.

Седален, глас 4:

Волнения моря житейского невляясь
преплывше,/ ко пристанищу спасительному/ со
славою приидосте, Богомудрии отцы,/ и сего
ради предстатели и молитвенницы/ за люди
земли Костромской явились есте.

Слава и ныне, **глас тойже:**

Блажим Тя вси,/ Пресвятая Владычице
Богородице, и молим Тя:/ со святыми
преподобными отцами Костромскими,/ испроси
душам нашим/ у Христа велией милости.

ПЕСНЬ 4

Ирмос: Господь мой – сила моя*, и на высокая
возводит мя* — пророк Аввакум моляся,
вопяше*, о Господе возрадовашася*, Бог от юга
приидет* во спасение людей своих.

Христу подобяся кротостию,/ вознесся
безстрашием на высоту добродетелей
духовных,/ и бесовскую гордыню отженив,/ яко
солнце от востока, чудес лучами/ возсиял еси,
отче Геннадие,/ велией славы от Господа
сподобяся.

Всенощные стояния и подвиг постнический,/
паче красная мира сего возлюбив;/ кадило
благовонное и миро благоуханное Владыце
явился еси;/ на Белоезере жительствуя, слезами
и потами благодать молитвы стяжав,/ души
притекающих к тебе ко спасению наставляя
еси,/ отче Кирилле блаженне.

Слава:

Адамантом в крепости духа быв, святе
Пахомие,/ державу вражию и силу низложил
еси,/ и похвалу победную почести приял еси,/
чудесными сиянии озаря вся.

И

ныне:

Лукавый умертвися змий, Дево, по рождестве
Твоем,/ и льстивый враг упразднися,
Пречистая;/ мы же Тя ублажаем,/ яко с Тобою
Господь.

ПЕСНЬ 5

Ирмос: Свет повеления Твоя*, в них же настави
мя, Владыко*, сего ради к Тебе утреннюю* —
Мира бо Божественного податель Ты еси.

Умертвив, преподобне Александре,/ плотския
страсти воздержанием,/ Христу прилепился
еси;/ и тело свое велиими подвиги изнуривши,/
кладезь Божественных дарований по благодати

явился еси,/ и яко победитель в духовных
бранех/ от Господа увенчася.

Крепостию духа в сердце своем Христа стяжав,/ и яко финикс, отче Иакове, во стране Галичестей процвел еси;/ высотой смирения украшаем,/ сокрушил еси гордыни змиев главы;/ темже Господь с лики преподобных сочета Тя.

Слава:

Радуюся о Господе, храм боголепен воздвигл еси,/ и той во имя рождества Предтечи именовал еси,/ в немже славится присно/ честное имя твое, Иакове преподобне.

И ныне:
Ангельский собор и человеческий род/ славит Тя и блажит,/ яко Матерь Христа, Спаса нашего,/ и молитвенницу о душах наших.

ПЕСНЬ 6

Ирмос: Возопих из чрева китова Иона*: да приидет к Тебе, Господи, молитва моя*, яко глубина морская пожре мя*, и в преисподних обретошася душа моя*; тем с пророком взываю Тебе Боже*: возведи от тли живот мой.

Яко кедр, иже в Ливане,/ умножи Господь
добродетели твоя:/ руку бо возложив на рало/
не озирался еси вспять, святе Адриане;/ сего
ради глас услыша, глаголющий:/ благий рабе и
верный,/ вниди в радость Господа твоего.

Кто не удивится твоему, преподобне Паисие,
смирению;/ или кто не похвалит святое твое на
земли пребывание:/ ужасается ми ум,/ како с
плотию безплотным ангельским силам
уподобился еси;/ с нимиже ныне предстоя
Пресвятей Троице,/ моли о нас непрестанно.

Слава:

Обителю явився Духа Святаго/ и на Ветлуге
уединенно жительствуя,/ мнози души от греха
ко пристанищу благому/ и спасительному,
Христу, направлял еси,/ окормляя, обличая и
уча словом и примером подвигов своих:/ сего
ради венец от Господа вечный приим,/ отче
блаженне Варнаво.

И ныне:
Славлю Тя, и любовью величаю,/ Препетая
Владычице:/ обетшавшия ны грехом, обновила
еси;/ и о Тебе вси радуемся,/ яко Бога Слова
родила еси.

Кондак, глас 8:

Костромского края благочестия подвижники/ и за грады и веси страны Российския теплыя предстатели явистесь,/ отцы преблаженнии, Христа Бога молитесь о нас,/ священный ваш собор почитающих и с любовью вопиющих:/ радуйтесь, отцы предивнии,/ Костромского края и всея России похвало и утверждение.

Икос, подобен акафиста «Радуйся...»:

Яко Богонасажденный сад, прозябший Божественною благодатию,/ явились есте, отцы всечестнии;/ в землях Костромских плод многосторицею принесяши;/ край сей молитвами и подвигами освятившия,/ и души мнози ко Христу приведшии;/ сего ради ублажаем вас, присно поя:/ радуйтесь, крини сельные, от рая Господня процветшии;/ радуйтесь, звезды мысленныя, яко солнце от востока духовного возсиявшии./ Радуйтесь, реки благодатныя, от Источника Божественного проистекающие;/ радуйтесь, светила умные, землю Костромскую светом благодати озаряющая./ Радуйтесь, наставницы, в вере истиной просвещающая;/ радуйтесь, пастырие, стадо словесных овец Христовых умножающая./ Радуйтесь, отцы

предивнии, Костромского края и всея России похвало и утверждение.

ПЕСНЬ 7

Ирмос: Богомерзкую идольскую лесть* в Вавилоне отвергоша отроцы*, истиннаго Бога исповедавшие*, в печь разжженную сами поидоша*, и небесною влагою орошаеми*, песнь победную вопияху*: Благословен еси, Боже отец наших.

Тленныя и земныя наслаждения отринув,/ пустынное житие возлюбил еси;/ и обители четыре создав,/ обучение ко благочестию лику иноческому явился еси;/ и в молитве на горе пребывая,/ образ Матери Господни обрел еси предивно,/ Богоносе Авраамие, отче наш.

Радуется дух твой ныне в небесных обителях, Макарие,/ яко от юности Бога возлюбил еси,/ и Тому от всея души поработав,/ Галичестей стране и всея Российстей земли похвало и утверждение явился еси;/ безплотных житию в пустыни подражая,/ яко Ангел непорочно пожил еси;/ сего ради зовем Ти:/ радуйся, жилище честное Духа Святаго.

Слава:

Отче Григорие, иже на Пельшме подвизавыйся;/

мира сего любве отрекся еси,/ и достиже
Горняго Иерусалима,/ идеже Христос царствует
со Отцем и Духом,/ венца нетленного
сподобился еси;/ со безплотными лики поя:/
благословен еси, Боже, отец наших.

И ныне:
Мати Света, Христа Бога нашего,/ Едина
Неискусомужна явилася еси, Всенепорочная,/ и
девствующи, законы обновляеши естества.

ПЕСНЬ 8

Ирмос: Землю на водах Повесившаго*, и огонь во
влагу Преложившаго*, отроцы в печи
благословяще* песнь с благодарением пояху*:
вся дела благословите, пойте Господа.

Свято житие твое, преподобне Ферапонте,/
купно же и смирение, еже стяжал еси;/ и ныне
святое тело твое/ исцеления многа источает с
верою притекающим;/ темже молим тя:
душевное здравие подавай нам,/ присно
Господу вопиющим:/ пойте и превозносите Его
во вся веки.

Кострома вельми тобою хвалится,/ и ублажает
тя, Никито досточудне,/ яко вселившеюся
благодатию в душу твою/ лукавно живущии в
человецех нечистии дуси отгоними бывають;/ и

Ангели на небесех о твоем на земли непорочном житии радуящися,/ хвалу возсылают Господу, вопия:/ пойте и превозносите Его во вся веки.

Слава:

Очистив ум свой, преподобне,/ в пустыни, яко в царских чертозах, со многим веселием живый;/ душетленные страсти воздержанием умертвил еси,/ и слезными потоки лукавого змия, яко в мори, погрузил еси,/ и, яко прах, того без вести сотворил еси,/ Луховская похвало, отче наш Тихоне, о Господе вопия:/ пойте и превозносите Его во вся веки.

И ныне:
Господа и Спаса нашего/ плотию родила еси, Безвестная Владычице,/ и Тобою избавление в мир прииде,/ и Адам от клятвы избавлен бысть, взывая благодаряще:/ Господа пойте и превозносите во вся веки.

ПЕСНЬ 9

Ирмос: Живоносный Источниче*, праведных честная Похвало*, Херувимов Честнейшая*, Серафимов без сравнения Славнейшая*, темже Тя, Благодатная, величаем.

Отлучився мирскаго пристрастия,/ в постнических удолиях, яко крин процвел еси,

отче наш Тимоне;/ преподобным Серафимом в
Надееву пустынь благословенный,/ и в
благодатном видении от святителя Николая
укрепленный,/ храмы воздвизал еси;/ и иноков
к пути теснейшему и блаженному призывая,/ в
истиной вере наставляя еси;/ и всех
приходящих к тебе утешал еси, старче
блаженне.

Подвигом добрым подвизавшиися,/
священномучениче Никодиме,/ со иными
новомученицами и исповедницами края
Костромского;/ таже и Царственный
страстотерпцы, яко корене Костромского
отрасль,/ идеже и на царство венчашася род
изначала;/ молитвы, яко дерзновенных
исповедников Господа пред отступники и
гонители:/ очистите нас от грехов наших
молитвами вашими,/ да утвердимся в вере
Православной.

Слава:

Отцы предивнии и всечестные,/ земли
Костромской молитвенницы и покровителие,/
течение жития привременнаго скончавшие,/ и
веру и заповеди Господни свято соблюдшии;/
ныне радуяся и веселяся,/ в Небесных обителях
почести обетованные приемшии;/ не отриньте
молитв наших,/ яко да ублажающе, любовию

прославляем вас.

И ныне:
Юнице Нескверная,/ Юнца Божественного
рождшая,/ прими молитву рабов Твоих;/ да
восхваляем Тя, яко Хранительницу земли
нашея,/ и Заступницу всего рода
христианского.

Светилен, глас 2:

Паче света солнечного, благодатным Светом/
просветилися есте, святии отцы,/ и сиянием
Божественным землю Костромскую озарили
есте,/ деяньми проповедуя Христово
Воскресение;/ сего ради вас ублажаем.

Слава и ныне, **глас тойже:**

Образ Твой, Пресвятая Владычице,
Феодоровским нарицаемый,/ якоже ковчег
завета в земли Костромской,/ почитаем, храним
и прославляем:/ исцеления бо и утешения чрез
него подаеши всем,/ с верою и упованием к
Тебе притекающим.

Стихиры на «Хвалитех», глас 8:

Ангелов собеседницы,/ и монашествующих
кротции наставницы,/ православия учителя и
ревнители,/ края Костромского просветители;/
якоже солнце от востока, лучами озаряющий,/
светом Божественным чудес ваших/ и яко
земная отложив, Небесная восприясте/ обители
Духа явистесь Пресвятаго,/ сего ради ныне в
чертозех Господних ублажаетесь,/ и Престолу
Владычному предстоя,/ о нас непрестанно
молитесь/ почитающих верою всечестную
память вашу.

Радуетесь ныне, благословеннии отцы,/ жития
земнаго треволнения прошедши,/ и пристанища
благоутишного достигше,/ небесными
дарованьми украсившиеся:/ звезды мысленныя,
светлейше просиявшие в землях Костромских,/
озаряющия верных сердца светом благодати,/
от Источника — Солнца незаходимаго, Христа
Бога нашего,/ и молитесь о душах наших.

Ины стихиры, преподобному Геннадию; глас тойже:

В законе Господнем поучаясь день и ночь/ и
свидения Его испытуюя,/ не дал еси отче, сна
очима твоима,/ ни веждома твоима дремания,/

дондеже в сердце своем обрел еси место
Господеви,/ селение Богу Иаковлю./ Сего ради,
яко храм духовен, благодатию Божию
приосененный,/ и доброе пристанище всем,
притекающим к Тебе, явился еси,/ и
неоскудный от честных мощей твоих/
источаеши верным источник исцелений.

Боголепно просия священная память твоя,
преподобне,/ лучами бо добродетелей,/ светом
же чудес твоих озаряеши сердца верных,/ сию
убо празднующе с радостию, ублажаем тя,/
принося песнь и благодарение Господу.

Слава, **глас тойже:**

Чтуще вас, преподобнии Костромские отцы,/
прославляем дивно предизбравшего вас
Господа,/ Егоже ради пожеланий плотских
отрекостесь,/ и духовнии людям явишася
наставницы,/ ныне в небесных обителях живете
веселящесь,/ тела же ваша, яже на земли,/
источают исцеления и отгоняют духи лукавыя:/
сего ради Божественную и светоносную/
ныне совершаем вашу память,/ в молитвах помощи
вашей призывающе.

И ныне, **глас тойже:**

Владычице, прими молитву раб Твоих,/ и избави нас/ от всякия нужды и печали.

СЛАВОСЛОВИЕ ВЕЛИКОЕ;

Тропарь собору и проч.

И отпуст;

НА.ЛИТУРГИИ

Прокимен, глас 7:

Восхвалятся преподобнии во славе,/ и возрадуются на ложах своих.

Стих: Священницы Твои оденуты в правду, и преподобнии Твои возрадуются.

Апостол: К Галатам, зачало 213

Аллилуия: глас 4

Возваша праведнии, и Господь услыша их, и от всех скорбей их избави их.

Стих: Многи скорби праведным, и от всех их избавит я Господь.

Евангелие: От Луки, зачало 24

Причастен: Радуйтесь праведнии о Господе, правым подобает похвала. Аллилуия: 3 раза.

